

堅

瓠

集

堅瓠五集卷之三目錄

神仙太守

一箇里長

中酒詩

沙河碑

努頭放衙

陳石泉南歸

燕京酒肆

琵琶辭

陳賢德遇仙

吳原博雪詩

蕭何功

酒色

汪若水

半歌

高麗國

題驛舍

陽春曲

秋興

曲巷垂楊

玉牌鐫詞

詩譏朱希真

解衣留鎮山門

詩意相類

作文別妻

教諭賦詩

七人同舟

項羽廟

朱良育詩

姓名詩

口吃贊

打命知州

石曼卿

姓名謎

曲牌名謎

藥名謎

呼名相謔

京官用傘

眼赤腰黃

一隊夸齊

造五鳳樓

嘲薄肉

吳朱喜得對句

館師歎

彈相國

殺風景

題望湖亭壁

張珣方猶

誕日優語

南風

石工能詩

寒山寺

雪將軍

讀書無油歌

莫愁湖

苧蘿山

因詩免役

秋風

垂魚釣鱉

言志

備大鵬

嘉善林知縣

堅瓠五集卷之三

長洲石農褚人獲學稼纂輯

神仙太守

成化中華亭張東海鄒爲南安太守律已
愛物大得民和壯年休致于皆成名殊無
一事累心蘇州別駕周德中目爲神仙太
守汝弼草十絕以答之見其無仙又有長
短句一篇意尤高古因錄詩并歌云歸休

太守似神仙布被蒙頭日夜眠却怪門前
來熱客馬蹄踏破紫雲烟古今何處有
神仙雀駕鸞驄總浪傳莫信空同鄒道士
刀圭入口亦徒然歐陽自號無仙子卓
識真知冠古今弱水蓬萊在何處愚夫白
骨紫苔深歌曰東海先生歸也南安太守
新除一挑行李兩船書被人笑道癡愚書
也書寒不堪穿饑不堪煮收拾許多何用

處況而今白髮蒼顏坐黃堂之署乘五馬
之車那得工夫再看渠又將載到南安去
古人糟粕誰味真腴枉說道黃卷中時與
聖賢相對語又寄內詩云四兒六歲五兒
三莫把肥甘習口饒一作清白傳家無我
規詩書事業要人擔三餐淡飯何須酒一
箸黃齏畧用塩聞說有人曾餓死等來原
不爲官廉詩振作聶大年詩又除夕詩云酒冷香

消夢不成道人殊覺歲崢嶸老如舊塵渾
無用坐戀殘燈亦暫明雪霰已應隨臘去
梅花聊復與春爭向來筋力虛名盡白髮
無愁也自生

一箇里長

潭浦趙從誼知獨山州州極荒涼因題柱
曰茅屋三間坐由我卧由我里長一箇左
是他右是他

中酒詩

老學庵筆記載宋太素尚書中酒詩云中
酒事俱妨偷眠就黑房靜嫌鸚鵡鬧渴憶
荔枝香病與嬾相續心和夢尚狂從今改
題品不號醉爲鄉放翁以爲非真中酒者
不能知此味明浙中舉子張子興傳亦有
中酒詩云一枕春寒擁翠裘試呼侍女爲
扶頭身如司馬原非病情比江淹不是愁

舊隸步兵今作敵故交從事却成讐淹淹
細憶宵來事記得歸時月滿樓比太素所
作更詳切有味

沙河碑

妾門東北三十里沙湖湖北爲塘隆然有
碑碑廣四尺許長四倍四面如之三面鐫
相視歌歌有前後皆築塘時相勸勞之語
也今已剥落不可辯其東面記民謠曰遠

挑新土纔希罕露盡黃泥始罷休兩岸馬
槽斜見底中間水線直通頭弘治丁巳督
理浙西水利工部主事姚文灝立石○父
老嘗言有舟行者利其同伴之資殺而瘞
其旁戲謂碑曰你知我知且勿語人碑忽
應曰我不語恐爾自語其人驚駭而去後
與一少年甚暱復過其地共憩碑陰告少
年曰是碑能作人言少年詢其故某以素

暈不覺傾吐少年口應而心動後偶乖隔
至相毆訴之官驗視抵服計少年之生卽
同伴死之日也與桐下所然石虎事同

努頭放衙

文潞公彥博爲榆次縣令題鼓樓云置向
樵樓一任撾撾多撾少不知他如今幸有
黃紬被努出頭來早放衙世傳宋太祖謂
縣令曰切勿於黃紬被裏放衙

陳石泉南歸

宋陳石泉南歸北人陳叅政餞之作木蘭
花慢云北歸人未老喜依舊着南冠正雪
暗潢池雲迷茫楊夢落邯鄲鄉心日行萬
里幸此身生八玉門關多少秦烟隴霧西
湖洗征衫燕山望不見吳山回首一歸難
慨故宮離黍故家喬木那忍重看鈞天紫
微何處問瑤池八駿幾時還誰在天津橋

上杜鵬聲裏闌干

燕京酒肆

金人徒徽宗至燕京行至平順州止驛舍
以七夕官中於驛作酒肆縱人會飲帝
於室中見一胡婦攜數女子皆俊目艷麗
或歌或舞或吹笛持酒勸客所得錢物率
歸胡婦稍不及輒以杖擊之少頃官遣吏
賣酒飲帝胡婦不知爲帝也亦遣一橫笛

女子入室對帝嗚咽不成曲帝問女子曰
吾與汝爲鄉人汝東京誰氏女也女顧胡
婦稍遠乃曰我百王宮魏王女孫也先嫁
欽慈太后姪孫京城陷被擄至此賣與豪
門作婢遭主母詬撻轉鬻於此俾在此日
父求酒食錢物若不及卽以箠楚隨之言
訖問帝曰官人亦是東京人想亦被擄來
此也帝但泣下遣之後此女流落至粘罕

陸羽集

卷三

六

處張純孝在雲中府于粘罕席上見之不
勝悲悼作詞云蹀眉秀盼向春風猶是宜
和粧束貴氣盈盈姿態巧舉止况非凡俗
宋室宗姬秦王幼女曾嫁欽慈族干戈橫
蕩事隨天地翻覆一笑邂逅相逢勸人飲
酒旋旋吹橫竹流落天涯俱是客何必平
生相熟舊日榮華如今憔悴付與杯中綠
興亡休問爲伊且盡船玉

琵琶辭

揚用修慎少時善琵琶每自爲新聲度之
及第後猶於暑月夜綰兩角髻着單紗半
臂背負琵琶共二三嬾人攜尊酒席地坐
西長安街上酒酣和歌撮撥到曉適李西
涯早朝過之間聞其聲異常流令人往訊則
云楊公子修撰也西涯爲之下車用修舉
卮飲西涯曰朝尙早願爲先生更彈彈罷

而火城將熄西涯入朝用修亦易朝服而
行朝退進閣揖西涯及其尊人西涯笑謂
用修曰公子韻度自足千古何必躬親絲
竹乃擅風華自是長安一片月絕不聞用
修琵琶聲矣

陳賢德遇仙

太倉陳賢德嘗遊荆湖間過岳陽樓有籃
輦道人貌甚猥瑣亦來就坐賢德前揖之

相與瞻眺湖山談笑良久適檻外一蟲鳴
行瓦上道人指示曰此螭唧蟲也遂別去
後賢德東還遇友人請仙題詩云十年不
見陳賢德今日相逢鬢已霜記得岳陽樓
上別兩人攜手說螭唧客都不解獨賢德
恍然下拜具話其事幸其遇仙而自恨不
識耳一作常熟陳朝相過呂純陽事

吳原博雪詩

堅瓠集

卷三

八

吳原博詩格尚渾厚琢句沈着用事果
切無漫然嘲風弄月之語有雪後入朝詩
云天門晴雪映朝冠步澀頻扶白玉闌爲
語後人須把滑正憂高處不勝寒飢鳥隔
竹餐應盡馴象當庭踏又殘莫向都人誇
瑞兆近郊或恐有袁安其愛君憂國感時
念物之情藹然可掬至如古人隨車編素
灞橋驢背自是閒話頭

蕭何功

韻語陽秋李義山詩云本爲留侯慕赤松
漢廷方識紫芝翁蕭何只解追韓信豈得
虛當第一功是以蕭何功在張良下也王
元之詩云紀信生降爲沛公草荒孤壘想
英風漢家青史緣何事却道蕭何第一功
是以蕭何功在紀信下也愚爲炎漢創業
何爲宗臣高祖喻指蹤之指盡之矣他入

豈容議耶

酒色

酒有以綠爲貴者白樂天所謂傾如竹葉
盈尊綠是也有以黃爲貴者老杜所謂
兒黃似酒是也有以白爲貴者樂天所謂
玉液黃金卮是也有以碧爲貴者少陵所
謂重碧醕新酒是也有以紅爲貴者李長
吉所謂小槽夜滴珍珠紅是也廣中所釀

酒謂之紅酒其色殆類胭脂西陽雜俎載
賈壻家蒼頭能別水常乘小艇於黃河中
以瓠匏接河源水以釀酒經宿酒如絳名
爲崑崙觴是又紅酒之尤者也

汪若水

宋汪若水從三宮北去留滯燕京時有王
清惠張瓊英皆故宮人善詩相見輒涕泣
若水和清惠詩云愁到濃時酒自斟挑燈

看劍淚痕深黃金臺迥少知己碧玉調高
空好音萬葉秋聲孤館夢一窓寒月故鄉
心庭前昨夜梧桐雨勁氣蕭蕭人短襟後
若水哀懇乞爲黃冠世皇許之瀕行與故
官人十八人醺酒城隅鼓琴叙別不數聲
哀音哽亂淚下如雨張瓊英送之詩云客
有黃金共壁懷如何不肯贖奴回今朝且
盡寄廬酒後夜相思無此杯

半歌

李密菴先生歌振有半歌云看破浮生過
半半之受用無邊半中歲月儘幽閒半裏
乾坤寬展半郭半鄉村舍半山半水田園
半耕半讀半經歷半士半民姻眷半雅半
粗器具半華半實庭軒衾裳半素半輕鮮
肴饌半豐半儉童僕半能半拙妻兒半撲
半賢心情半佛半神仙姓字半藏半顯一

半還之天地讓將一半人間半思後代與
滄田半想閻羅怎見酒飲半酣正好花開
半吐偏妍恍張半扇免翻顛馬放半韁穩
便半少却饒滋味半多反厭糾纏百年苦
樂半相叅會占便宜只半

高麗國

元豐初高麗國遣使來朝問其使云國與
契丹爲隣每因誅求不能堪國主常誦華

嚴經祈生中國一夕夢至京師備見城邑
官闕之盛覺而慕之乃爲詩以記之曰惡
業因緣近契丹一年朝貢幾多般移來忽
到中華裏可惜中宵滴漏殘

題驛舍

靖康之變有題關中驛舍云鼙鼓轟轟聲
徹天中原廬井半蕭然鶯花不管興亡事
粧點春光似昔年又渭平沙淺雁來樓渭

國朝詩集 卷三 三
漲沙深雁不歸江海一身多少事清風明月淚霑衣

陽春曲

白仁甫陽春曲云笑將紅袖遮銀燭不放才郎夜看書相偎相抱取歡娛止不過趕應舉及第待如何又百忙裏鉸甚鞋兒樣寂寞羅幃冷串香向前攬定可憎娘止不過趕嫁裝悞了又何妨

秋興

韓德溫先生諱汝王子幼年受業師也工書尤善臨摹曾見賈人其求書前操及蘇子瞻古人諸名蹟裝潢成卷爲泰興鉅公重價購去昨檢敗笥見先生秋興七絕已經四十餘年幾殘滅不可讀幸猶記憶錄之以誌今昔之感云梧桐蔭石綠生簾正
是池塘雨後天讀罷南華無一事北窓支

枕聽秋蟬一辭柯黃葉擁柴關野老前谿
載菊還莫謂地幽人不到一尊風雨話寒
山二一簾小雨綠如烟茗熟欣逢未見篇
幽思只隨池畔菊寒香差勝落梅前三雲
陽驛畔草蕭蕭曉騎嘶風客路遙殘月多
情猶送我一村烟火又河橋四偏愛時宜
學母妝貪簪茉莉髻凝香相逢亦有憐心
者何獨憐予更斷腸五舞衫歌扇動情多

稱體新裁薄薄羅更愛酒闌明月靜小窓
低唱雪兒歌六庭花凍合淨無塵夢裏行
雲覺未真何至相逢頻掩袂想因羞見意
中人七

曲巷垂楊

吳耳淵沈朗倩門人有楊柳詞云新調小
馬趁飛花行到垂楊曲巷家三扣玉扉人
未起忽聞鸚鵡喚燒茶又貽所思云曾騎

竹馬過君家。坐牙床。飲露茶。贈我金盆。
今尙在何當重搗鳳仙花。

玉牌鐫詞

梁谿楊仲弘

載

一日遊鳳凰山過宋大內

獨步微吟尋香問主。泫然興感至披香閣。
址拾得玉牌一事。上有鐫詞云。內人曉起。
怯春寒。輕揭珠簾。看牡丹。一把柳絲收不
得。和風搭在玉闌干。楊爲之憮然。

詩譏朱希真

二老堂詩話洛陽朱希真自靖康亂離避
跡山林嘗三召不起高宗特補迪功郎後
賜出身歷浙東提刑致仕居嘉禾詩詞獨
步一世秦丞相欲令希真教秦伯陽作詩
遂落致仕除鴻臚寺少卿或作詩云少室
山人久掛冠不知何事到長安如今縱插
梅花醉未必王侯着眼看蓋希真舊有鷗

鵲天云是清都山水郎天教懶慢帶疎狂
曾批給露支風勅累奏留雲借月章詩萬
首醉千場幾曾着眼看侯王玉樓金闕嬾
歸去且插梅花住洛陽最膾炙人口詩故
以此譏之○按希真名敦儒宋東都名士
有西江月詞云世事短如春夢人情薄似
秋雲不須計較苦勞心萬事元來有命幸
遇三盃酒美况逢一朵花新片時歡笑且

相親明日陰晴未定。日日深盃酒滿朝
朝小圃花開自歌自舞且開懷且喜無拘
無礙青史幾番春夢紅塵多少奇才不須
計較與安排領取而今見在江蓠蘿雪濤
小書云朱希真小字秋娘商人徐必用妻
二詞列之閨秀詩評中未知何據

解衣留鎮山門

松江佘山慧日院佛像落成徐文貞惜春

堅瓠集

卷三

共

世廟欽賜蟒衣一襲付僧圓實因賦一詩
云單衣露冷宿曇華誤綰官袍傍帝車
向山門君莫笑細看還是舊袈裟萬歷丁
酉陸文定樹聲年八十有九亦以衲衣一
襲付慧日院手書偈於衲之表云解組歸
來萬慮捐盡將身世付安禪披來戒衲渾
無事不向歌姬爲乞緣此二事與東坡解
帶留鎮山門同一風流也

詩意相類

輟耕錄有詩云天遣魔軍殺不平不平人
殺不平人不平人殺不平者殺盡不平方
太平又唐詩節要有詩云中原不可生強
盜強盜纔生不可除一盜旣除羣盜起功
臣多是盜根株二詩語意相類後義尤佳
郎仁寶云前首第三句卽第二句意欲易
不平原是難平者後首第二句不可除皆

但欲易強盜纔生大盜俱尤覺精采

作文別妻

輟耕錄錢塘道士洪丹谷與一妓通因娶
爲室病且革顧謂洪曰妾死在旦夕卿須
自執薪還肯作一轉語乎夫妾歌兒也卿
能集曲調於妾未死時使預聞之雖死無
憾矣洪固滑稽者遂作文曰二十年前我
共伊只因彼此太癡迷忽然四大相離後

你是何人我是誰恭惟某人秀鍾谷水聲
過楚雲玉交枝堅一片心錦纏道餘二十
載遽成如夢令休憶少年遊哭相思兩手
託空意難忘一筆勾斷且道如何是一筆
勾斷孝順歌終無孝順逍遙樂永遂逍遙
聽畢一笑而卒

教諭賦詩

昔有舉人任縣學教諭適察院按臨邑官

各遠迎彼嚮後至接見於郭外水次按公
心恠之抵公署閱冊曰汝以舉人作教故
傲我耶且試汝詩寧稱我意否乃以水次
椿子爲題蓋譏其爲朽木也教諭吟詩云
獨立汚泥沙今經幾歲華有心依古道無
意泛仙槎春至萍爲葉風來浪作花本來
梁棟器無奈用時差吟畢按公稱賞明年
果以教職會試高占春榜

七人同舟詩

宋徐適秋闈中式買舟抵都下時同舟已
集六人乃陳李張黃周蘇姓也徐適亦登
舟共濟陳姓者曰舟中之人凡七請以七
人同舟聯一律周姓者起曰陳李張黃蘇
與周張姓者云更添徐子分相投陳姓者
云竹林風月連三郡李姓者云北宿光
聚一舟蘇姓者云作者應知同議論黃姓

者云評臣頭是合謀猷徐通云胸中各有
平津策此去知誰作狀頭及次年春榜徐
遂狀元及第

項羽廟

項羽廟在內黃烏江道中歲時土人過客
祀焉一士遊其廟瞻像吁嗟惜其不得秦
鹿命殞青鋒因題詩於廟云楚水淋淋漢
水波楚山河屬漢山河范增有意空彈玦

項羽無謀爲倒戈子弟八千垓下散佳人
一曲帳中歌今來欲問前朝事莫也將軍
記得麼詩成大風西來揚沙飄瓦江湧洶
濤凜有喑啞叱咤之餘威士人曰項將軍
英爽其未泯與何聞詩而遽怒也復吟一
絕以慰之曰巍巍廟貌峙江濱大將端爲
血食神尊德不湏懷舊恨漢家今已屬他
人由是風恬浪息天晶日皎如故

朱良育詩

閩中陳侍御琳典南畿學政甚得士心正
德間以諫去國諸生皆作詩送之獨朱良
育詩最爲傳誦其詩云春風露冕出郊原
落日停驂望國門抗疏要談天下事謫官
應過海南村湯湯江漢羈人淚納納乾坤
聖主恩歷試古來名節士爲言身屈道尤
尊識者以爲不下李帥中送唐御史也

姓名詩

權德輿以古人姓名作詩云藩宣秉戎寄
衡石崇位勢年紀信不留馳張良自魏
蘓則爲愜瓜李斯可畏不顧榮宦尊每陳
農畝利家林顧岩巘負郭躬歛積忌滿寵
生嫌養蒙恬勝智踈鐘皓月曉晚景丹霞
異澗谷永不諉山梁冀無累頗符生肇學
得展禽尙志從此直不疑支離踈世事○

陸子立來聲雋或取嘉靖初年大臣名爲
詩云穆穆文孫交景運端居齋宇撫清時
絲綸遙起山林俟化雨重陶琰琬資韶樂
揚廷和舜呂溪毛澄水薦先師功如墮甕
宏謨遠壽比錢彭澤慶垂共說天王守仁
義萬年磐石珪圖維

口吃贊

談苑劉貢父放性滑稽喜嘲諢與王彥祖

汾同在館中汾病戶吃放爲之贊曰恐是
昌家又疑非類未聞雄鳴只有艾氣周昌
韓非楊雄鄧艾皆古之吃者也○時馬默
爲臺官彈放輕薄不當在文館放曰旣云
馬默豈令驢鳴

打爺知州

談苑王介知常州劉貢父以語譴之介曰
貢父非豈弟君子乎貢父曰雖非豈弟君

子却是打爺知州常州風俗毆父有橋名
曰打爺橋

石曼卿

談苑石曼卿中立初登第有人訟科場廢
落數人曼卿與焉次日被黜者皆作三班
借職曼卿爲詩曰無才且作三班借請俸
爭如錄事叅從此免稱卿真進且須走馬
東北南

姓名謎

夸堅志元祐間士大夫好事者取達官姓名爲詩謎如長空雪霽見虹蜺行盡天涯過帝畿天子手中持玉簡秀才不肯着麻衣謂韓絳馮京王珪曾布也又云人人皆戴子瞻帽君實新來轉一官門狀送還王介甫潞公身上不曾裁謂仲長統司馬遷謝安石溫彥博也又述齋間覽一詩謎云

佳人伴醉索人扶露出胸前似雪膚走入
繡幃尋不見任他風雨滿江湖乃賈島李
白羅隱潘閏四詩人也又解人願一詩謎
云張翁勝祖有施爲鑿壁偷光夜讀書縫
線路中嘗憶母老翁終日倚門間乃孫權
孔明子思太公望也

曲牌名謎

解人願有曲牌名詩謎三首別來懷恨積

奴勝繫人刺鳳描鸞罷繡筐繡停欲寫衷

腸無片紙盡不情粧蛾黛少張郎懶畫金

屋嬋娟影在東聯堂情人有約總成空

期記得少年騎竹馬要孩看看又是白頭

翁鮑老花殘紅遍地鮮鋪地沉吟抱怨

未成眠照相鏡鸞塵掩頻上倚驚妝盼恨

良人各一天望遠

藥名謎

解人頤有藥名詩謎三首一幅花箋決不
欺相莫相煩寄與我親兒附子休圖自己
營生計獨活須念高堂白髮稀知母醫生
舖裏盡皆空沒藥修寄家書無筆踪白芷
船行水急帆休掛防風雨過街頭跌老翁
滑石江上乘騎赴早潮海馬不勝將軍棄
甲逃敗醬赤壁溪前棲過夜宿沙曉來帶
露掛征袍砒霜

呼名相謔

豫章漫抄云瑣綴錄所載侶鍾強珍二公
以名相謔事固有偶然者弘治乙丑內閣
試庶吉士以春陰爲題下注不拘體同年
王欽佩韋作歌行爲諸老所賞太僕少卿
儲柴墟壠讀其稿至警句云朱閭十二畫
沉沉畫棟泥融燕初乳柴墟擊節歎賞曰
絕似溫李子時在座曰本是王韋爲一絕

倒蓋取摩詰蘇州以指其名也又吉水徐
舜和穆爲侍讀以誕日邀諸吉士會飲凡
同年皆聚齒若在座主家則門生遜一席
舜和分考易房時徐子容經穆伯潛孔暉
皆出其門舜和以次行酒大聲曰徐穆二
生坐此而忘其名之自呼也爲之一笑

京官用傘

卓異記明京官例不用傘惟試官入場狀

元歸第乃用之其後南京官稍稍用傘雖
躋高位特兩簷青傘而已有南北兩京官
相戲北曰輸我腰間三寸白言常朝官有
牙牌也南曰多君頭上兩重青言出用傘
也又玉堂漫筆劉襲封誠意伯有華蓋
殿侍宴退朝詩云團團褐羅傘被服金文
章則明南京官僚已用之矣○戒庵漫筆
外任官與京職官相遇外任官曰我愛京

官有牙牌京官曰我又愛外任有排衙蓋
朔望衙役齊集恭謁頭踏舞蹈謂之排衙
眼赤腰黃

談苑宋制翰林學士佩金帶朱衣吏一人
前導兩府則兩人笏頭帶佩魚曰重金居
兩制久者則曰眼前何日赤腰下甚時黃
處內庭久者則曰眼赤何時兩腰黃甚日
重

一隊夸齊

皇朝初定鼎諸生有養高行遜者順治丙戌再行鄉試其告病觀望諸生悉列名與考滑稽者作詩刺之曰聖朝特旨試賢良一隊夷齊下首陽家裏安排新雀帽腹中打點舊文章當年深自慚周粟今日幡思喫國糧非是一朝忽改節西山薇蕨已精光聞者絕倒

堅瓠集

卷三

三

七

造五鳳樓

譚苑華浦韓洎兄弟皆有文辭洎常輕浦
語人曰吾兄爲文譬如繩樞草舍聊蔽風
雨予之爲文是造五鳳樓乎浦聞之因親
知寄蜀牋題詩贈洎曰十樣鸞箋出蜀州
寄來新自浣溪頭老兄得此全無用助爾
添修五鳳樓

嘲薄肉

董思白至友館中值中膳見肉甚薄因作
詩云主人之刀利如鋒主母之手輕且鬆
薄薄批來如紙同輕輕裝來無二重忽然
窓下起微風飄飄吹入九霄中恐忙使人
追其踪已過巫山十二峰近又見一詩云
薄薄批來淺淺鋪厨頭娘子費工夫尋閒
不敢開窓看恐被風吹入太湖

吳朱喜得對句

吳處厚善屬詞知漢陽軍謂鸚鵡州沔鄆
佳處欲賦詩未就一日視事綱吏告覆舟
吳問所在吏曰在鸚鵡堰吳村案大喜曰
吾一年爲鸚鵡洲尋一對不得天俾汝也
因得未減王梅運勾骨立有風味朋從目
爲風流該骨崇寧來未朱彥在金陵府集
見官妓中有極瘦者府尹朱世英謂彥曰
亦識生色骷髏否彥欣然爲王勾得對

館師歎

文衡山有館師歎詩云暑往寒來春復秋
等閒白了少年頭半飢半飽清閒客無鎖
無枷自在囚課少父兄嫌嬾墮功多子弟
結冤仇何時得遂男兒志解散胸中萬斛
愁予向有硯田詩笑一帙計七言律四十
首上卷二十首俱用先生笑話集成下卷
二十首描寫館中苦况大有思致惜爲人

寄去僅記三律云先生虛話說難全實景
描來更可憐馬眼桶橫叩乙巳梅花筍倒
去求仙二厘一管羊毛筆五箇三張麪袋
簾鐵硬紫硃稀爛墨亂批習字點而圈

村館從來說可傷舊家風景更卽當庭隅
每泛渾尿桶屏後常留宿浴湯厚意涼拖
一把扇盛情白滾兩條薑歲終節物無多
送一塊年糕又少糖館童頑劣實堪羞

捉七遊河踢石毬燈掛倏移油累帳點心
無剩碟忘收窩茶亂塞尿脛被添粥深櫃
黑指頭若更輕輕攢一記是非搬壞不相
留皆可噴飯餘惜忘之近於友人案頭見
嘲學究三詩又詩笑所未載因錄於左博
得虛名叫相公四時六節若無窮兩盆臭
菜朝朝罩半注黃湯夜夜空燒壞油燈無
一足跌殘筆架缺三峯補頂帳子陳年絮

冷暖常教睡不濃 一壺白水灌空心六

筍齊攢四葉盆三春不見河魴面八月空

聞黃蟹名蘿蔔傍邊沾油膩粉皮頭上帶

葷腥惟有一片黃草布朝晨揩面夜揩臀

勸人切莫做先生滿肚塵糟氣不平一

身羈絆如繩縛兩耳齊蟬似雀鳴質笨但

嫌無教法功多又說自聰明更有一般堪

恨處束修直欠到如今

彈相國

林居漫錄萬曆中京師禁中舍宴客祇應
中有善彈琵琶者一客問曰若會彈何故
事曰會彈蕭相國月下追韓信又問曰又
會彈趙相國雪夜迎宋祖客復問曰又會
彈秦相國東窓定計客曰你如今莫彈了
若再彈恐又彈出一箇相國來盡以刺晉
江李九我廷機也中舍遽起掩客口而餘

客皆去明制會推大臣凡平清議者不得
列名彈墨未乾枚卜已及所以有歇後鄭
五之刺也

殺風景

西清詩話李義山雜纂品目數十蓋以文
滑稽者其一曰殺風景謂清泉濯足花下
晒視背山起樓燒琴煮酒對花啜茶松下
喝道塵塵中晏元獻罷相守頽以惠山泉

烹日注置酒賦詩云稽山新茗綠如烟靜
挈都監煮惠泉未向人間殺風景更持醪
醑醉花前又元豐末王荆公居金陵大漕
蔣之奇夜謁公於蔣山嘯唱甚都公取花
下喝道語作詩戲之曰扶衰南陌望長楸
燈火如星滿地流但怪傳呼殺風景豈知
禪客夜相投自是殺風景之語頗傳於世

望湖亭絕句

吳俗好遊遇春花秋月名山勝景賞玩必
至四方輜駟君子過其地者無不遊覽以
故廼廊粉壁寫怨抒懷題咏殆遍有善詠
居士題楞伽山殿壁二絕云望湖亭在太
湖西多少遊人胡亂題我也胡題題一首
待他泥壁一齊泥又多時不見詩人面一
見詩人丈二長不是詩人長丈二緣何放
屁在高牆見者絕倒

張璠方猶

挑燈集異嘉靖初張璠以議禮得君賜名
孚敬時有不平者乃以其姓名爲隱語曰
這長弓心勿一佐王不正除非撇了頭夷
三族滅絕子孫方洩萬民之怨虧了這篇
歪文字苟就了功名順治丁酉方猶興試
江寧賄賂公行士子恨之拆方猶二字云
一萬刀狗首

誕日優語

撫郡侯誕日所屬一州六縣牧尹皆稱賀
在座矣惟崇明尹後至值閉門不得入徬
徨無計乃密召一優謂之曰汝能使郡公
延我入必重賞優諾之乃於筵前發科高
吟曰黃堂太守不是人座賓聞其所吟俱
失色又一優問曰是甚麼荅曰却是天上
老壽星座賓皆解頰頤續吟曰今日八仙

來慶會眼前只少呂洞賓一優答之曰洞
賓因在東海中採度索桃來獻故此來遲
如今已在門外了郡公聞而悟其意亟啟
門延崇令入席怡成八仙郡公喜甚而厚
賞之蓋崇明縣治在海中故優及之

南風

書曰無比頑童逸書曰美男破老男色所
從來遠矣逮漢魏鄒通雙閨孺極而思讓

帝位挺立男后其流禍未有不浸淫亂及
於內者沿至於今閩廣兩越尤甚京師所
聚小唱最多官府每宴輒奪其尤者侍酒
以爲盛事俗呼爲南風碣石刺談有士夫
狎一童與之寢處捐五金投之童弗悅也
或戲之曰此有成語君未知耳士夫固問
或曰不聞右丞詩乎惡說南風五兩輕衆
爲之絕倒

石工能詩

一石工初不識字後入山遇異人授以術
便能作詩隨口應答一人令以自身試作
一詩卽答曰省事心常逸無營機更忘庸
人多自擾疑客爲人忙性癖交游少踈狂
興趣長日長無俗事高枕樂羲皇適又有
一人至其人貧困不堪令其卽以爲題答
曰最怪攢眉客胸襟不放開人生貴瀟洒

天運在輪迴好景休孤負黃金買不來百
年渾是夢回首卽塵埃

寒山寺

唐張繼楓橋夜泊詩云月落烏啼霜滿天
江楓漁火對愁眠姑蘇城外寒山寺夜半
鐘聲到客船世多傳誦近孫仲益過楓橋
寺詩云白首重來一夢中青山不改舊時
容烏啼月落橋邊寺欹枕猶聞半夜鐘亦

可謂鼓動前人之意矣

雪將軍

閒居筆記毛貴咏雪將軍詩云滕六來臨
拜將壇五丁力士下雲山白頭未得封侯
印皓首猶能禦八蠻月下冷披銀鎖甲霜
中獨守玉門開明朝應逐陽和散留得英
名萬古傳

讀書無油歌

湛盧朱復之冬夜讀書無油作歌云君不
見蔡公酣歌徹清曉銀燭成堆燒不了又
不見齊奴帳下選佳人平生熨蠟不疊新
南園花蠟巧心計祇爲渠濃照珠翠生憎
詩客太繁酸畧不分光到文字欲學懸壁
衡鄰燈夜不明欲學囊螢車十月霜無蠟
人生窮達真有命大約不須問起來摩挲
蓮座真人圖還有青藜老杖照人無

莫愁湖

莫愁湖在秣陵城中三山門外有妓盧莫
愁家此故名江波疊柳翠黛堆雲風鬟月
鏡彷彿在朝烟暮雨中鄭谷過此題詩云
石城昔爲莫愁鄉莫愁魂散石城荒帆來
帆去江浩渺花開花謝春悲涼

苧蘿山

山堂肆考郭素聞王軒遊苧蘿村遇西子

亦從而遊焉留詩泉石間寂無所遇無名
子作詩云三春桃李本無言却被斜陽鳥
雀喧借問東隣效西子何如郭素學王軒

因詩免役

唐筠州任濤咸通進士常侍李陽見其詩
有露漙沙雀起人臥釣船流之句特與免
役鄉民訟之陽判云江西界內有詩似濤
者並與免役又辛元龍字慶甫號松垣先

生有氣節以詩援任濤例求免稅丁太守
判云松垣筆力破滄溟欲援任濤免稅丁
一段風流好公案錦江重寫入圍屏

秋風

常州靖江縣本江陰之馬駝沙也明天順
間始設縣知縣郭某題福客所送扇轉贈
之云馬駝沙上縣新開城郭民稀半草萊
寄語江南諸子弟秋風切莫過江來今人

千謁者謂之打秋風故云

垂魚釣鱉

泊宅編關子容鮮爲推官才俊而容止不
揚持服中過南徐客次見一緋衣朝士偃
坐關揖而問之朝士疑爲攫徒因譴關曰
太子洗馬高垂魚良久復詢關關答曰基
之官皇帝贖牛低釣鱉朝士駭曰是何官
位關笑曰且欲與君對偶親切爾

言志

有客各言其志或欲多財寶或欲爲廣陵
刺史或欲乘鸞上昇一人聞而笑曰我殆
欲兼之也惟願腰纏十萬貫騎雀上揚州
○張晉侯言昔一人應受生謂轉輪王曰
要我爲人必依我願方去王曰云何對曰
父是尙書子狀元繞家十頃五升田魚池
花菓般般有美妾嬌妻箇箇賢充棟金珠

并米穀盈箱羅綺及銀錢身居一品王侯
位安享榮華壽百年王曰有此好處我自
去了何待於汝予曰人生在世總無實事
既作妄想何不再求跨崔昇仙方爲萬全
借大鵬

廬山道士體貌魁偉飲酒啖肉一日有崔
憇止于庭道士喜謂嘗赴上帝之召乃控
而乘之擬欲飛昇奈羽儀清弱不勝其載

而難次日則養者知訢於官薄責示懲處
士陳沆作詩嘲之曰唱和先生欲上昇黃
雲踏破紫雲崩龍腰霍背無多力傳語麻
姑借大鵬

嘉善林知縣

成化中嘉善知縣林某捶死一家十三人
鄆城倡鐘按浙將窮治之林厚賂鎮守中
官李文使文宴倡以緩其事倡知之預令

優人爲滑稽語以拒之因扮一官賞雪作
雪獅子令藏陰處以俟後黃曰何處可藏
一卒云山陰可乎曰不可卒又曰江陰可
乎曰不可其官高聲曰但藏在嘉善縣可
也卒云此地無陰何以藏之官曰汝不見
嘉善林知縣打殺一家非死罪十三人不
償命豈非有天無日頭處一座皆驚文亦
不敢效齒